



15. oktober 2013

Inatsisartut suleriaasianni § 37 naapertorlugu Naalakkersuisunut makkuninnga apeqquteqaateqassaanga:

- 1) Ukioq manna oktoberip aqqaneq aappaanni Naalakkersuisut siulittaasuat Reykjavik-imi, Islandimiittumi, ataatsimeersuarnermi oqaaseqarpoq akuersaanngilluinnarnissamik politikkeqarnerup atorunnaarsinneqarneratigut, uranimik pīaanermut tunisassiornermullu atatillugu, “...KALAALLIT NUNAAT SIUNISSAMI UNGASISSORSUUNNGITSUMI ANNERTOORUJUSSUARMIK URANIMIK AVAMMUT ANNISSUISINNAALISSASOQ – ILIMANARLUNI NUNARSUARMĪ ANNERSAASUT 10-IT AKORNANNIILISSASOQ IMALUUNNIIT URANIMIK AVAMMUT ANNISSUINERMI ANNERSAASUT 5-IT AKORNANNIILISSASOQ ILIMANARLUNI.” Taamatut oqarnermi uraneqarfiit soppiaanuku Naalakkersuisut siulittaasuata pigai?**
- 2) Taamatut oqaaseqarneq aatsitassarsiutileqatigiinnut ataatsinut (GME-kkunnut) namminneq oqarnerattut uranimik pīaanissamut akuersissummik massakkut qinnuteqaateqangajalersaartunut Naalakkersuisut qanoq sunniuteqassangatippaat?**
- 3) Kalaallit Nunaata nunatut uranimik tunisassiortutut ingerlalersinnaanera pillugu taamatut oqaaseqarneq nunarsuarmi tunisassiorfiit paasinninnerannut Naalakkersuisut qanoq sunniuteqassangatippaat?**
- 4) Naalakkersuisut uppersarsinnaavaat aatsitassat qinngornernik ulorianartunik akullit pillugit akuersaanngilluinnarnissamik politikkeqarnerup atorunnaarsinneqarnissaa aalajangiunneqarpat imaalissanersoq Naalakkersuisut uranimik aatsitassanillu allanik qinngornernik ulorianartunik akulinnik pīaanissamut qinnuteqaatinik akuersissutinik tunniussisalernissamut piginnaatitaalissanersut – aappi naagaluunniit?**
- 5) Naalakkersuisut uppersarsinnaavaat akuersaanngilluinnarnissamik politikkeqarnerup atorunnaarsinneqarnissaa ima aamma isumaqalissammat nunatut uranimik avammut tunisassiortutut inissimalernissaq pillugu Kalaallit Nunaat pisortatigoortumik naalakkersuinikkut isummersimasoq – aappi naagaluunniit?**

**6) Islandimi oqalugiarnep unnuakuani Naalakkersuisut siulittaasuata “erseqqissaat”-mik taasamik oqaaseqarpoq. Tassani Naalakkersuisut siulittaasuata erseqqissarpara saniatigooralugu pissarsiasatut uranimik piiaanissaq pineqartoq. Siusinnerusukkut apeqquteqaatitsinnut aatsitassarsiorfiup piunerani saniatigooralugu pissarsiarineqartup pingaarnertut pissarsiarineqalersinnaanngorneranut tunngatillugu (§ 37 nr. 118 aamma 176) akissuteqarnikuunersi eqqarsaatigalugu paaserusunnarpoq apeqqut tamanna pillugu Naalakkersuisut isumartik allannortissimaneraat?**

(Inatsisartut ilaasortaq Sara Olsvig, Inuit Ataqatigiit)

### **Tunngavilersuut**

Islandimi ataatsimeersuarnermi Naalakkersuisut siulittaasuata oqaaseqarpoq akuersaangilluinnarnissamik politikkeqarnerup atorunnaarsinneqarneratigut nunatut uranimik avammut tunisassiorlutut Kalaallit Nunaata inissimalernissaa aqutissiuunneqartoq. Peqatigitillugu Naalakkersuisut siulittaasuata nalilerpara Kalaallit Nunaat – “siunissami ungasissorsuunngitsumi” – nunarsuarmi nunat uranimik tunisassiorlut annersaasa ilagilissagaat. Naalakkersuisut siulittaasuata oqaaseqaammi erseqqissaanermik taaneqartumi oqaatigaa “Kalaallit Nunaanni uranimut niuerutigineqarsinnaasumut ilisimaneqartumut tunngatillugu, uani pineqartoq tassaavoq urani tassaammat aatsitassanik qaqutigoortunik qalluinnermut atatillugu qaqinneqartartoq, tamannalu tassaavoq Naalakkersuisut uranimik akuersaangivinnerup atorunnaarsinneqarniarnerani tunaartarisaat.”

Inuit Ataqatigiit § 37 naapertorlugu apeqquteqaataannut arlalinnut Naalakkersuisut akissuteqartarnikuupput ajornaquteqaangitsoq aatsitassarsiornermi “saniatigooralugu pissarsiaq” piffissap ingerlanerani aatsitassarsiornermi “pingaarnertut tunisassiarineqalersinnaassammat.”

Oqaaseqarnerit pillugit aperisariaqalerpugut taamatut naliliinerup suna tunulequtarineraa, taamatuttaaq Naalakkersuisut nalunaarutaat assigiinngitsut erseqqissaavigineqarnissaat Inatsisartunut ilaasortatut pisariaqavissuutippara.

Apeqqutit piaarnerpaamik akillaqunarput, ajornanngippat immikkoortup 106-ip aappassaaneerineqannginnerani.